



Communicaziun a las medias

Berna 06-09-2024

Ignazio Cassis scuntra las regenzas chantunalas dal Tessin e dal Grischun en il cor da la Svizra

Scuntrada trilaterala oz a Sviz tranter il cusseglier federal Ignazio Cassis e las regenzas dal Tessin e dal Grischun a chaschun dal dialog politic regular cun ils dus chantuns da la Svizra taliana e rumantscha. Il schef dal Departament federal d'affars exteriurs (DFAE) ha elegì in lieu simbolic en il cor da la Svizra per questa scuntrada. Las discussiuns èn sa concentradas sin temas d'interess communabel, en particular las relaziuns transcunfinalas e la promoziun da la plurilinguitad, sco er sin la situaziun da la Mesolcina e da l'Alta Vallemaggia, zonas pertutgadas fermamain da las malauras en il decurs da la stad.

A chaschun dal dialog politic regular ha il cusseglier federal Ignazio Cassis beneventà oz las regenzas chantunalas dal Grischun e dal Tessin a Sviz. In lieu simbolic a l'origin da l'istorgia confederala. Suenter ina visita en il Museum dal Patg federal ed in inscunter cun las autoritads da Sviz èn las discussiuns sa concentradas sin temas d'interess communabel, sco la tgira da la pluralitad svizra, la valurisaziun da las minoritads e la collavuraziun transcunfinala.

Il schef dal DFAE ha regurdà a l'engaschi dal Departament da garantir ina represchentanza eguala da las diversas communitads linguisticas en l'administraziun federala ed en las interpresas liadas a la Confederaziun. Lura è vegnì tematisà il tschintgavel anniversari da l'Emna Rumantscha, l'emna da promoziun dal rumantsch en il mund, che vegn ad esser il 2025. Ensemen cun las ulteriuras emnas deditgadas a las autras linguas naziunalas permetta questa occurrenza d'accentuar las diversas realitads culturalas da la Svizra e da contribuir a la coesiun naziunala ed al maletg dal pajais a nivel internaziunal.

Silsuenter è il project "Piccolo Erasmus" vegnì tractà. Quel permetta a collavuraturas e collavuratur da las administraziuns chantunalas da passentar in segiurn professional tar il DFAE e viceversa. Suenter la suttascripziun d'ina cunvegna tranter



las trais partidas l'onn passa a Poschiavo è la voluntad da cuntinuar e rinforzar il project ch'è vegnì instradà il 2021 vegnida confermada.

Sin las tractandas eran plinavant las malauras che han tutgà grevamain ils dus chantuns en il decurs da la stad. La situaziun actuala en las zonas pertutgadas è vegnida discutada ed igl è vegnì tematisà il sustegn da l'armada e da las autoritads federalas per reconstruir las vias da colliaziun e per las lavurs da reconstrucziun en la Mesolcina ed en l'Alta Vallemaggia.

Svilups positivs tar las relaziuns transcunfinalas

Il cusseglier federal Ignazio Cassis ha rapportà da la visita ch'il vicepresidente dal Cussegl e minister dals affars externs talian Antonio Tajani ha fatg en Svizra. La dinamica positiva da las relaziuns bilaterals cun l'Italia ils ultims onns è vegnida accentuada ed en pli è vegnidas approfondadas dumondas transcunfinalas actualas e d'interess per ils dus chantuns, sco la collavuraziun cultura u ils svilups dal martgà da lavur, dal sector da traffic e dal provediment d'energia.

Engaschi per la valurisaziun dal Tessin e dal Grischun

Dapi sia elecziun en il Cussegl federal il 2017 mantegna Ignazio Cassis in dialog politic regular cun las regenzas chantunals dal Tessin e dal Grischun sco er cun ils represchentants da la Svizra taliana en las Chombras federalas. Ils dus chantuns al sid da las Alps porschan plinavant savens il palc per inscuters diplomatics e visitas da ministers esters sco er per impurtantas occurrenzas naziunals ed internaziunals. Exempels per quai è la Ukraine Recovery Conference a Lugano u la conferenza annuala dals ambassadurs e la seduta extra muros dal Cussegl federal ch'èn stadas 2022 a Puntraschigna ed en la Val Monastero. L'ultima scuntrada trilaterala tranter il DFAE e las duas executivas è stada avant dus onns a Berna.